



## Universitätsbibliothek Paderborn

**Novæ Observationes Et Additiones Ad A. R. P. D.  
Bartholomæi Gavanti Congreg. Cleric. Regul. S. Pauli ac  
Sac. Rit. Congregat. Consultoris Commentaria In Rubricas  
Missalis Et Breviarii Romani**

Adiectis Summorum Pontificum & Sac. Rit. Congreg. Decretis usque ad  
præsens emanatis

Complectens omnia Gavanti Commentaria in Rubricas Breviarii - Cum  
Indicibus Decretorum, Rerum atque Verborum notabilium

**Merati, Gaetano Maria**

**Augustæ Vindelicorum, 1740**

**VD18 10783695-002**

De Titulo Breviarii Romani. Cap. I

**urn:nbn:de:hbz:466:1-39775**

## SECTIO SECUNDÁ.

*De Præludiis Breviarii Romani.*

### Novæ Observationes, & Additiones ad Gayanti

#### Cap. I. De Titulo Breviarii Romani.

**I.** Avant. pag. 11. col. 1. num. 1. -- *Breviarium, vox est satis antiqua &c.)* Preces vocales, quæ singulis diebus à Clero recitari debent, varia fortitæ sunt nomina apud antiquos, ut etiam adnotavit noster Gayantus *scilicet. 1. cap. 1.* Plerique Patres appellarunt has preces *Divinum Officium*, ex quo Deo præstare, & persolvere debemus hoc laudis Sacrificium: *Oremus, psallamus, reddamus Domino Officium, & sic ad vincam properabit*, ait S. Hieronymus in vita S. Pacomii. Quoniam igitur Ecclesiæ oratio est debitum quoddam, atque Officium, quod Deo persolvit; hinc tale nomen sortita est. Appellatae etiam sunt hujusmodi preces *Hora Canonica*, quia à Regulis, sive legibus Ecclesiæ, quæ Canones vocantur, præscriptæ sunt, vel potius quia statutis horis tales preces ab Ecclesiæ recitandæ sunt. Sanctus Columbanus in sua Regula *cap. 47.* prædictas preces *Cursum* appellat, & S. Gregorius Turonensis *lib. 1. de gloria Martyrum* ait, opus à se conscriptum fuisse *de Cursibus Ecclesiastici*, quod & alio loco repetit: *Ex urgente Abbeate cum Monachis ad celebrandum Cursum &c.* Fortunatus quoque, quem citat etiam Gayantus supra citato loco, in vita S. Germani Parisiensis, de illo ait: *iter agens semper nudo capite Cursum recitavit*. Rursus in vita Sancti Alberti Abbatis sub medium septimi sæculi, sanctique Serenici legitur: *quotidie Romanum Cursum decantasse*; ita in sæculo secundo, & tertio Benedictino. Denique S. Bonifacius Moguntinus Episcopus Clericis suis *Epiſt. 17.* mandans, ut Officium horis ab Ecclesia statutis recitarent, eodem nomine illud appell-

lat: *speciales horas, & Cursum Ecclesiæ custodiāt*. Videatur etiam Mabillon in *Dissert. de Cursu Gallico*. Idem *Divinum Officium* in *Regula S. Pacomii Collecta* dicitur. In compluribus Conciliis *Agenda* appellatur. In Concilio Agathensi *Can. 3.* *Missa* nomine designatum fuit, ut etiam alibi, nempe in primo Tomo nostr. *Observ.* adnotavimus. In *Regula Sancti Benedicti opus Dei* appellatur, quod propter Deum laborem illum *Sanctum subeamus*; & ab aliis *Pensum servit* *ii. dictum* fuit, tanquam Deo debitum ab hominibus servituti ejus devictis.

Denique idem Officium *Breviarii* appellationem acquisivit, quæ quidem nuncupatio non est antiquior Micrologo, ut notat Gayantus, qui testatur, se apud antiquiores hanc nuncupationem nondum legisse.

**II.** Gayant. pag. 11. col. 1. num. 2. *Significat autem compendium &c.)* Officium *Divinum Breviarii* nomen fortasse sortitum est, quod temporis successu idem Officium valde contractum fuerit, præfertim apud Monachos, ut notat Grancolas *Comment. historic. in Breviar. Rom. lib. 1. c. 3.* testatur siquidem, S. Benedictum ad breviorem formam redigisse præfatum Officium, cum antea totum Psalterium recitaretur quotidie à Clero, ipse vero ita rem composuit, ut semel tantum in hebdomada absolveretur. Breviarium igitur dictum est Officium *Divinum*, quasi *Breve Horarum*, sive *Precum Epitome*, quod quidem Breviarii nomen Micrologi Ævo, nempe anno 1080, pervulgatum fuit, & exinde semper usurpatum ad designandum *Divinum Officium*. Hinc in statutis Abbatum

tum



tum Provincia Narbonensis anno 1222. promulgatis, sanctum est, ut Monachi in Sacris Ordinibus constituti in longo itinere profecturi sine Breviario, vel Psalterio non missantur, & in Spicilegio Dacheriano Tom. 6. Concilium Tholosanum anno 1229. habitum Canon. 14. Laicis usum Sanctorum librorum interdicit, prater Psalterium, & Breviarium; Ne libros veteris Testamenti, aut novi Laici permittantur habere, nisi fuerit Psalterium, vel Breviarium pro Divinis Officiis. Immo in Monasterio Cassinensi reperitur Breviarium ad usum Chori, quod censetur exaratum anno circiter 1100. cum hac inscriptione -- Incipit Breviarium, seu Ordo Officiorum per totam anni decursione, ita resert Eminentissimus Card. de Lambert. in secundo volumine suorum Edictorum instruct. 4. num. 5. Hucusque dicta ostendunt nomen Breviarii libro Divinorum Officiorum appositum non fuisse, nisi post Micrologi atatem, quia idem floruit circa ann. 1000. Quod si apud Grancolas in Commentario Historico Breviarii Romani lib. 1. cap. 6. legitur, S. Augustinum Angliae Apostolum secum in ea Insula Breviarium tulisse, non inde sequitur, quod tunc temporis praedictum nomen fuerit in uso, sed nomine Breviarii intellexit praedictus Auctor Librum Psalmorum, seu Divini Officii, cui applicuit illud nomen, quo impræsentiarum utimur.

III. Gavant. pag. 11. col. 1. num. 3. Usus tamen Breviarii quounque nomine vocaretur &c.) Amalarius noni saeculi Auctor Commentarios conscripsit in Breviarium Romanum, atque post illum Rabanus, Alcuinus, Walafridus Strabo, & alii, horum postremus ait, Officii Romani originem à S. Petro repetendam esse, deinde ejusdem Officii Romani tria tempora, seu status distinguit, cui consonat etiam Durandus in Rational. lib. 5. capit. 2. pluresque alii. Primum constituunt ab Ecclesia exordiis, usque ad annum 420. ajuntque per ea tempora Officium Oratione Dominica, Apostolorum Symbolo, certoque

Psalmorum numero absolutum fuisse, quæ in Cleri, & Fidelium Conventibus recitabantur, ut innuere etiam videtur S. Paulus 1. Corinth. cap. 14. v. 26. illis verbis -- Cum convenitis unusquisque vestrum, Psalmum habet, Doctrinam habet &c.

Secundus Officii Divini status est ille, quem prædicti Scriptores asserunt evenisse post annum 420. ajunt enim, quod precum diversitas confusione in Ecclesia pareret, & quod Hæretici Catholicorum Officium ludibrio haberent, hinc, instante Theodosio, Damasum Papam S. Hieronymo mandasse, ut Psalmorum in diei, & noctis horas distributionem institueret; hanc autem Psalmorum distributionem, necnon Lectionum digestiōnem ab Hieronymo factam, & à Damaso approbatam, ab universa Ecclesia receptam fuisse, sed revera hujus Officii Romani reformationis nulla habetur sufficiens probatio, nihilominus credibile non est, Strabonem, Scriptorem alioquin satis accuratum, hæc sine fundamento Scriptis consignasse; unde dicendum est, nono saeculo monumenta quædam fortasse extitisse, ex quibus conjici potuit, predictum Pontificem S. Hieronymo impoñuisse onus distribuendi Psalmos, & concinnandi Lectiones in Divinis Officiis recitandas.

Postquam Officium Div. à S. Damaso, seu potius à S. Leone, S. Gelasio, S. Gregorio Magno, Hadriano I. Greg. III. digestum fuit, & in meliorem ordinem distributum, Greg. VII. postremam illi manum imposuit, & hic dici potest tertius Officii, seu Romani Breviarii status. Officium hoc, ita à Gregorio reformatum, à Micrologo ejusdem Pontificis Auctore contemporaneo describitur; idemque Pontifex, ut in Hispania Romanum Officium recipere tur, effecit. Idque colligitur ex ejusdem Epistolis ad Sancium Aragoniæ, atque ad Alphonsum Castellæ Reges datis; idemque Simeoni, in Regnis illis Episc. per litteras mandavit. S. Gregorius Magnus cum in Angliam S. Augustinum misset,

sisset, Romanos libros eo perferri curavit, Romanumque Officium, & alii Ritus ibi inducti fuerunt, ut constat ex Concilio Cloveshoviensi, habito anno 748. prohibente in illis Regionibus aliud Martyrologium, aliam Psalmodiam, seu Cantilenam, quam Romanam. Hairo vero, Basileensis Episcopus, in suis Statutis, anno 824. editis, Presbyteris suis Breviarii Romani recitationem comendavit *Can. 24.* præscribendo etiam, ut Horis Canonicas diu, noctuque juxta Ecclesiæ Romanæ morem adesse non negligerent. Denique Pipinus, Carolusque Magnus Officii Romani pulchritudine illecti id in sua Regna introducere statuerunt. Carolus Calvus verò Romano Officio hoc perhibuit testimonium: *Celebrata sunt coram nobis solemnia more Hierosolymitarum, & more Constantinopolitano, & sicut in Gallia, in Italia, & Toleti.* Sed nos sequendam judicavimus in omnibus Romanam Ecclesiam. Quibus verbis declaravit, se post spectatas Orationes omnes apud Græcas, & Latinas Ecclesias usurpatas, nihil ordine Romano sapientius distributum invenisse. En igitur, quibus laudibus commendatum fuit nono saeculo Breviarium Romanum, ut reliquis aliarum Ecclesiarum præponeretur.

IV. Gavant, eodem n. 3. -- *Haymo Generalis Minister Ordinis Minorum sub Gregorio IX &c.* Quamvis Breviarii, seu potius Officii Divini aliqualis contractio instituta fuerit a S. Gregorio VII. ut supra diximus, ac propterera Officium ita contractum Breviarium appellari incooperit, nihilominus aliam vicissitudinem, aliamque contractionem iterum passum est in Romana Curia Divinum Officium, currente nempe saeculo XIII. ut Radulphus Tungrensis de *Canonum observantia proposit.* 22. refert, aitque, Pontifices, cum olim in Laterano Palatio degebant, Romanum Officium in eorum Sacello haud ita absolutum, ut in aliis Ecclesias, recitare consueville, quod & Pontificii Sacelli Clerici faciebant, ut negotiis suis vacare possent, ad-

Gavant. Rubr. Brev.

ditque Radulphus, hujus Officii ordinarium se vidisse collectum Innocentii III. tempore. Hoc Breviario usos suis Minores creditur, cum S. Franciscus, eorum institutor, eis mandasset, ut Divinum Officium secundum ordinem Romanæ Ecclesiæ peragerent. Existimantes igitur Ecclesiæ Romanæ morem illum esse, qui in Pontificio Sacello servabatur, & cum præterea Missionibus Apostolicis distinerentur, ideo contractum Breviarium, quod in Pontificis Sacello recitabatur, suscepere. Breviarium porro istud cum male digestum esset, Haymo, Franciscanorum Generalis, in id incubuit, ut Officium, quod Romanum dicitur, reformaret, & ad meliorem statum, mandante, & approbante Gregorio Papa IX. perduceret; idque colligitur ex Wadingo tom. 3. Annalium minorum ad annum Christi 1244. Religionis minorum 37. Nicolaus vero III. Teste laudato Radulpho mandavit, ut Breviarium prædictum in singulis Romanæ Urbis Ecclesiis adhiberetur - sciendum est, quod Nicolaus PP. III. natione Romanus de genere Ursinorum, qui cœpit anno 1277. & Palatium apud S. Petrum construxit, fecit in Eccl. Urbis amoveri Antiphonarios, gradualia, Missalia, & alios libros Officii antiquos quinquaginta, & mandavit, ut de cætero Ecclesiæ Urbis uterentur libris, & Breviariis Fratrum Minorum; quorum Regulam etiam confirmavit, unde hodie in Urbe Roma omnes libri sunt novi, & Franciscani hæc Radulphus, qui antecedenter dixerat, duplum olim suis Romæ modum Divini Officii, ut etiam nos innuimus, unum breviorem, quo Romana Curia, seu Capella Pontificis utebatur, alterum prolixiorum pro cæteris Ecclesiis Urbis, qui proprius Ritus Romanus dicebatur; opera vero Fratrum Minorum utrumque Officium Curia, & Ecclesiæ in unum coauissem, ita ut prolixiori, & proprio abrogato, omnes postea Ecclesiæ, excepta Lateranensi, Officium Curia usurpaverint. Sed Radulphum vel in Fratres Minores male affectum,

B

fectum,



fectum, vel deceptum fuisse, evidenter probare contendit Franciscus Pagius in vita Nicolai III. num. 22. ex eo, quod centum fere annis ante institutionem, & confirmationem Ordinis Minorum factam ab Honorio III, omnes Ecclesiae Urbis, excepta Lateranensi, relieto Officio antiquo, quo Romana Ecclesia utebatur, novum illud Breviarium jam admississent. Quod certo eruitur ex Petro Abaelardo, qui in Epistola Apologetica, quam scripsit adversus S. Bernardum p. 250. ait: *Aniquam Romane Sedis consuetudinem nec ipsa Civitas (Romana) tenet, sed sola Ecclesia Lateranensis, qua Mater est omnium, antiquum tenet Officium, nulla filiarum suarum in hoc eam sequente, nec ipsa etiam Romani Palatii Basilica, id est, Capella Pontificia.* Si itaque Petri Abaelardi tempore, hoc est circa annum 1140. in omnibus Ecclesiis Urbis Romae legebatur illud Officium Breviatum, quo pacto dicere potuit Radulphus, Nicolaum III, mandasse, ut Ecclesia Urbis uterentur Libris, & Breviariis Fratrum Minorum, cum centum, & quinquaginta circiter annis ante Nicolaum III. Officium illud breviatum, quod, ut idem Radulphus asserit, secus sunt Fratres Minores, in omnibus Romanæ Urbis Ecclesiis, excepta Lateranensi, legeretur, quod aliquo modo fatetur ipsemet Radulphus, dum ait, se vidisse Roma hujus Officii ordinarium a tempore Innocentii III. recollectum, ideoque ante Fratres Minores. Hæc omnia Franciscus Pagius, qui alia subdit in vindicando suo ordine Franciscano a Radulphi querimoniis. Verum cum ipsemet Wadingus loco supracitato fateatur, Breviarium ab Haymone correctum iussu Gregorii IX. eò auctoritatis pervenisse, ut in ordinarium S. R. E. Ritum transiverit præcipiente Nicolaum III. Idque probante Wadingo supra adducta auctoritate Radulphi Tungrensis, mihi videtur sustineri posse, Nicolaum III. præscripsisse omnibus Ecclesiis, in quibus jam introducta erat recitatio Officii contracti, sed male digesti, celebrationem ejusdem Officii, & usum alio-

rum librorum, sed juxta emendationem, & correctionem factam ab Haymone Franciscorum Generali, & a Gregorio IX. approbatam.

Breviarium Romanum modo supradicto à Fratribus Minoribus contractum, seu potius recognitum, & correctum, brevius adhuc redditum fuit hortatu Clementis VII. à Francisco Quignonio, Cardinali S. Crucis, & inscriptum est hoc Titulo --- Breviarium Romanum ex Sacra potissimum scriptura, & probatis Sanctorum historiis &c. -- Prædictum Breviarium editum reperio prius Romæ Anno 1536. deinde Venetiis 1537. Typis Luca Antonii Junctæ in 8. & iterum Venetiis 1546. in officina ad signum Agnus Dei pariter in 8. & denique iterum Venetiis 1563. apud hæredes Luca Antonii Junctæ, quæ quidem editiones Venetæ aservantur in nostra Bibliotheca S. Silvestri de Urbe in Quirinali. Quamvis hoc Breviarium, regnante Clemente VII. confectum fuerit nihilominus non nisi sub Pontificatu Pauli III. fuit promulgatum, & non solum Romæ & Venetiis, ut mox exposuimus, sed etiam Lugduni, & Parisiis, & quidem pluries, editum fuit, ut infra dicemus. In hoc Breviario perlegebatur totum Psalterium singulis hebdomadis, terni Psalmi singulis horis Canonis, unius longitudine cum alterius brevitatem sic compensata, ut labor legendi diurnus par propemodum fuerit omnibus diebus, sive de Feria, sive de Festa recitaretur Officium. Rursus in eodem Breviario Veteris Testamenti magna, & utilissima pars, totum verò novum, præter partem Apocalypsis in toto anno legebatur. In eodem Breviario semiduplicibus expunctis sola duplicitum, ac simplicium distinctio servabatur, quorum inter se discriben in hoc maxime positum erat, quod illa duas, pridie videlicet, atque ipso die; ista verò unas dumtaxat ipso die Vespertas habent. Nulla in eodem Breviario reperiuntur Capitula, nulla Responsoria, nulli versificuli, non quia hæc supervacanea, aut in-

uti-



utilia viderentur (augent enim, ut fatetur Auctor ejusdem Breviarii in sua Præfatione, pietatem, & sunt Scripturæ Sacrae particulae) sed quoniam cùm introducta sint ad Cantus potissimum modulandos, & legentes sepe morentur cum molestia recitandi, idcirco hæc prætermitti satius judicavit Quignonius, contentus Lectione Scripturæ Sacrae, que, ait ipse, magis facit ad pietatem, atque doctrinam privatim legentium, quorum hac quidem in parte maiorem rationem habere voluit, quam concinentium. Denique desideratur in hoc Breviario Officium parvum B. V. in aliis Breviariis usitatum, cuius omissione non minuitur ejusdem Virginis honor, ait Quignonius: Nam paucis Festis exceptis, quotidie variis Commemorationibus adoratur, & obsecratur: Atque ejus memoria multis dicatis eidem Festis, & Octavis pro cuiusque ratione celebrantur, ipsique solitum Officium tribuitur Sabbatis ferè omnibus, præterquam in Quadragesima.

De hoc Breviario Quignoniano speciale mentionem facit Riccardus Simon in primo Tomo suarum Epistolarum Selectarum Epist. 27. data sub die 4. Januarii 1685. aitque, hujusmodi Breviarium a Facultate Parisiensi primùm fuisse rejectum, & se legisse in Regestis ejusdem Facultatis censuram ab eadem factam anno 1535. quæ est sub hoc Titulo Notæ Censurariae S. Facultatis in Sacrum Quignonii Breviarium. In qua quidem censura adnotatum fuit discrimen, quod reperitur inter hoc, & antiqua Breviaria, sequentibus præcisis verbis. Cùm autem hæc usque adeo salutaria Ecclesiæ instituta in Ecclesiasticis Officiis a primordio fermè Ecclesiæ ad hæc usque tempora servata fuerint, mirum, quoniam pacto is, qui novum hoc Breviarium edidit, hæc omnia rejiciat, ac rejecienda decernat, tanquam, ut inquit, nec ad pietatem, nec ad cognitionem Sacrae Scripturæ, magnopere conducant . . . . parum quoque sapere lobrie visus est hujusmodi Scriptor, dum suam unius sententiam

antiquis Patrum decretis Communi & approbato usui, ac Ecclesiæ authenticis Historiis minime erubuit præferre; proinde ut quam periculosa sit, nec ferenda hujusmodi Breviarii editio, cognoscant omnes, opera præmium est ostendere. Ex quibus liquet, Theologos Parisienses non approbasse impressionem hujus Breviarii, & in eadem Censura subiectunt alia argumenta suppressiendi eundem compendiarium cursum divini Officii. Sleidanus, Auctor Lutheranus, lib. 9. Conscius prædictæ censuræ, audacter assertit, & Theologis Parisiensibus Quignonianum Breviarium tanquam Hæreticum fuisse proscriptum, sed impudentissimè loquitur, cùm ex censura supradicta satis constet, non tanquam hæreticum, sed ob alia motiva Facultatem Parisiensem non approbasse dictum Breviarium, & equidem paucis post annis, & alio exhibito examine ejusdem Breviarii eadem Facultas mutavit sententiam, permisitque anno 1540. novam editionem dictæ Breviarii, quæ Lugduni secuta fuit, & facta legitur cum privilegio summi Pontificis, & Galliarum Regis sine approbatione tamen Inquisitoris Orii, & Doctorum Sorbonensium. Deinde de anno 1552. iterum idem Breviarium prodidit Lugduni Typis Teob. Paganii cum Regio privilegio, & accidente correctione, & examine Matthæi Orii Doctoris Theologi, & Inquisitoris Generalis, & cum approbatione Facultatis Sorboniae juxta normam illorum temporum. Apud eundem Paganii impressum jam fuerat idem Breviarium de anno 1547. & 1548. ibidem Lugduni pariter editum fuerat apud hæredes Blasii Guidonis de anno 1557. & de anno 1544. in fol. Typis Bald. Arnoulet. Parisiis verò anno 1542. Typis Ambros. Graud. in 4. & tursus ibidem typis Francisci Maguet in 8. majori, anno verò 1545. typis Thiel Kervel in 12. Eiusdem Breviarii usus quadragesima circiter annorum spatio perseveravit, nimurum à Paulo III. usque ad S. Pium V. Pontificem maximum, nunquam tamen



præcepta fuit, sed solum permisla hujuscem  
Breviarii recitatio.

V. Gavant. pag. 11. col. 1. n. 4. *Restitu-*  
*tum dicitur Decreto Concilii Tridentini, editum*  
*autem à Pio V. Quamvis Breviarium Qui-*  
*gnonianum ab aliquibus fuerit admisum,*  
*non omnes tamen Ecclesiæ, neque Regula-*  
*res Ordines eo utebantur; multi enim Diœ-*  
*ceseon suarum peculiaria Brevaria adhibe-*  
*bant, & nonnulli alii priscum Romanum re-*  
*citabant. Hujusmodi erant nostra Congre-*  
*gationis Patres, qui, ut refert Antonius Ca-*  
*racciolius in notis ad nostras Constitutiones,*  
*seu in Synopsi Veterum Religiosorum Rituum*  
*part. 1. ad Caput 1. n. 11 nunquam Quigno-*  
*nii illud Brevissimum Officium, quamvis li-*  
*cuisse, recitarunt; porrò tanti fecit Clemens*  
*VII. Joannis Petri Carafa, & Cajetani Thie-*  
*naci, aliorumque nostrorum Patrum Sacro-*  
*Rituum eruditioinem, & in divino cultu*  
*exquisitissimam diligentiam, ut anno*  
*Christi 1529. iisdem per literas Apostolicas,*  
*quas refert Historicus noster Joseph Silos*  
*part. 1. pag. 95. concesserit, ut Missas, &*  
*Divina Officia ipsorum, ac præcipue Cara-*  
*fa industria ad meliorem formam compo-*  
*sta per annum publice experiri, atque in*  
*Choro recitare liceret; eaque nostrorum Pa-*  
*trum experimento probata, exacteque recon-*  
*gnita posset postmodum sedes Apostolica pu-*  
*blico Ecclesiæ usui tradere. Quod & fe-*  
*cit: Nam jam dictum Millale, & Brevia-*  
*rium, quod nostri Seniores ediderant, ad Con-*  
*cilium Tridentinum primò delatum est: In-*  
*de verò quèd Concilii PP. gravissimis aliis*  
*occupationibus, & negotiis distenti, Sacris*  
*Ritibus, Officiisque recognoscendis vacare*  
*non possent, cura ejusmodi ad Summum*  
*Pontificem rediit; itaque Pius V. nostrorum*  
*Patrum correctionibus, & commentationibus*  
*valde approbat, & Bernardini, Scoti,*  
*Cardinalis Tranensis, ac Thomæ Golduell,*  
*Episcopi Asafensis, Præfulum è nostro Or-*  
*dine insignium, opera, atque eruditione ad*  
*hanc rem perficiendam adhibita, Millalem*

librum, & Breviarium Sacrarum precum ad  
pristinum decorem, gravitatemque restitu-  
tum, ac methodo certiore dispositum, usui  
Ecclesiæ Orbis feliciter tradi-  
dit, ut liquet ex ejus Bulla Breviario Roma-  
no præfixa. Prædicta omnia tradit laudatus  
Caracciolius loco citato, & fuisus narrat in  
vita Pauli IV. Nostri Ordinis conditoris ab  
eodem diligenter digesta, sed nondum pre-  
lo commissa: Eadem pariter refert Chrono-  
logus noster supra citatus, qui addit, perdi-  
ficile hoc negotium ad auctoritatem, judi-  
ciumque Romani Pontificis post Concilium  
Tridentinum iterum relatum, tandem fau-  
stè absolutum à Pio V. qui in iis, quas in Ro-  
mani Breviarii fronte literas affixit, se, &  
antecessores suos a Paulo IV. Exemplar, ac  
posthumas ejus curas testatur secutos quām  
studiosissime fuisse, neque ab hac mente Tri-  
dentinorum PP. propositum discrepasse iis  
verbis -- *Patres in illa salutari reformatione à*  
*Concilio Constituta Breviarium ex ijsa Pauli IV.*  
*Ratione restituere cogitarunt. Sustulit itaque*  
*Sanctus Pontifex Pius V. gravissimis dictus*  
*rationibus, ac potissimum, ne in materia Di-*  
*vini Cultus quidquam innovaretur, usum*  
*Breviarii Quignoniani, quod à præcedentibus*  
*Pontificibus Clemente VII. & Paulo*  
*III. erat quidem approbatum, sed non ge-*  
*neratim, videlicet pro Ecclesiasticis in sacu-*  
*lo degentibus dumtaxat, ac dummodo spe-*  
*cialiem singuli super hoc ab Apostolica sede*  
*facultatem haberent, ut testatur Ludovicus*  
*Donius d' Attichis tom. 3. Florum Historiae*  
*Sacri Collegii ad annum Christi 1527. n. 14.*  
*ubi subnecit, quod si usum hujuscem Brevia-*  
*rii abrogavit Pius PP. non propterea Qui-*  
*gnonii intentionem damnavit, immo meritis*  
*est unusquisque laudem suam apud Deum*  
*& homines tam Pontifex, quām Cardinalis,*  
*qui nunquam cogitavit inventum ullum no-*  
*vum in Ecclesiam inducere, nisi approban-*  
*tibus, & annuentibus summis Pontificibus,*  
*quorum censuræ omnia sua dicta, scriptaque*  
*perpetuò subjecit, unde ad calcem Prafa-*  
*tio-*

tionis, quam Breviarii sui fronti prefixit, Paulum PP. III. Cui eam direxit, sic affatus est -- *Habes Pater SS. instituti nostri rationem, habes formulam Breviarii; supereft, ut si tibi res, quemadmodum speramus, non improbabitur, ipse quoque faveas incēptis nostris, & labori publica commoditatis gratia suscepto.*

De hujus Breviarii suppressione sermonem etiam habet Ciacconius in vita Clementis VII. qui Quignonum PP. Franciscanorum

Generalem Sacro Collegio adscripsit; de quo communiter Cardinali S. Crucis in Hierusalem nuncupato, commendabilem etiam mentionem faciunt Onuphrius in Clemente VII. Marcus Ullisponensis Episcopus Portuensis, seu potius Portugallensis sub Archiepiscopatu Bracharense Part. 3. Chronicor Ord. Seraphici l. 8. cap. 11. & 47. Bzovius ad annum 1526. & 1527. Spondanus ad annum 1527. Wadingus Laudatissimus scriptor, Ordinis Minorum.

## Novæ Observationes, & Additiones ad Gavanti

### Cap. II. De Bulla Pii V. & De Usu Breviarii Romani.

I. Gavant. pag. 11. col. 2. num. 2. Enarrat ea, que in hac re præstite Paulus, & Pius nomine quarti &c.) In brevi historia, quam supra tradidimus Breviarii Romani a Pio V. reformati, & recogniti nonnulla enarravimus circa ea, que præstitit Paulus IV. Congregationis nostræ Institutor, unde ne eadem repetamus, nunc prætermittimus.

II. Gavant. pag. 11. col. 2. num. 3. Abulet omnino Breviarium à Cardinali S. Crucis compositum &c. De hoc Brevario à Cardinali Quignonio composito, & à S. Pio V. proscripto satis locuti sumus supra, & idcirco ad alia addenda nunc progredimur.

III. Gavant. pag. 12. col. 1. num. 15. Non potest amplius omissum repeti &c.) Ubi omisso proprio Brevario, receptum est illud Sancti Pii V. non solum ex sententia Suarez non potest amplius omissum repeti, sed etiam ex Decreto S.R. C. edito die 15. Martii 1608. & dato in nostro Indice sub num. 31. in quo declaratur, quod usus Missalis, & Breviarii Romani semel introductus in Ecclesia, que habebat particulare Missale, & Breviarium, confirmandus est, nec licet redire ad usum Antiqui Missalis, & Breviarii.

IV. Gavant. pag. 12. col. 2. num. 24. Et hic est sensus eorum verborum Decretri &c.) Decretum, quod affertur hic à Gavanto, datur in nostro Indice sub num. 58. quod quidem

Decretum eandem prorsus vim habet, ac ipse Bullæ Pontificie, & Breviarii Rubricæ, tum quia est à S. R. C. editum, & ejus observantia omnibus stricte prescripta, tum quia idem Decretum laudavit, & approbat Urban. VIII. & ab omnibus sub pœnis Constitutionis Pii V. ubique respective servari præcepit, novisque Breviarii imprimendis præfigi mandavit.

Prefati autem Decreti obligatio se extendit ad omnes Ordinarios tam Sæculares, quam Regulares, quo nomine cum Episcopi comprehendantur, multo magis qui iis sunt inferiores, nimirum Abbates, Decani, Prepositi, ceterique Ecclesiarum Praefides, Rursum etiam Capitula, & Monasteria à Jurisdictione Ordinariorum exempta. Dispositio tamen allegati Decreti sic accipienda est, ut non afficiat eos, qui Romano usui adstricti non sunt, nam qui ex Bulla Pii V. suo adhuc proprio Brevario gaudent, neque hoc Decreto urgentur juxta Sententiam Guyeti lib. 1. cap. 2. quaest. 3. quia cum accessorium sequatur naturam principalis, illi, qui ad principalem non obstringuntur, neque ad accessorium tenentur; ita Guyet. Sed si ex vi hujus Decreti non obligantur prædicti ad servanda ea, quæ ibi statuuntur, ex aliis tamen Ecclesiæ statutis, & Canonibus eadem profecto præstare debent, cum non nisi au-

